

四庫全書

集部

欽定四庫全書

雙溪類稿卷十

宋 王炎 撰

長短句 井序

長短句序

古詩自風雅以降漢魏間乃有樂府而曲居其一今之  
長短句蓋樂府曲之苗裔也古律詩至晚唐衰矣而長  
短句尤為清脆如么絃孤韻使人屬耳不厭也予於詩  
文本不能工而長短句不工尤甚蓋長短句宜歌而不

宜誦非朱唇皓齒無以發其要妙之聲予為舉子時早  
夜治程文以幸中於有司古律詩且未暇著意況長短  
句乎三十有二始得一第未及升斗之粟而慈親下世  
以故家貧清苦終身家無絲竹室無姻侍長短句之腔  
調素所不解終喪得簿崇陽逮今及五十年而長短句  
所存者不過五十餘闕其不工可知矣今之為長短句  
者字字言閨閣事故語陋而意卑或者又為豪壯語以  
矯之夫古律詩且不以豪壯為貴長短句命名曰曲取

其曲盡人情惟婉轉嫵媚為善豪壯語何貴焉不溺於  
情慾不蕩而無法可以言曲矣此炎所未能也曹公論  
雞跖曰食之無益弃之可惜此長短句五十餘闕亦雞  
跖之類也故哀而集之因發其意於卷首云嘉定十一  
年四月朔日雙溪王炎序

蝶戀花

崇陽縣園夜飲

纖手行杯紅玉潤滿眼花枝雨過顰脂嫩新月一眉生  
淺暈酒闌無奈添春困 喚起醉魂君莫問憔悴顏容

羞與花相近人自無情花自韻風光易老何須恨

點絳脣

崇陽野次

雨濕東風誰家燕子穿庭戶孤村薄暮花落春歸去

浪走天涯歸思縈心緒家何處亂山無數不記來時路

臨江仙

吳宰生日

欲近上元人意好月如人意團圓暖風催趣養花天三  
山來宦駕萬戶識鳬仙手種河陽桃李樹暫時花發  
春妍綵衣一笑棹觥船明年當此日人到鳳池邊

好事近

同前

時節近元宵天意人情都好煙柳露桃枝上覺今年春  
早過雲一曲鳳將雛疑是在蓬島玉筍扶杯潏潏願  
黑頭難老

水調歌頭

留宰生日

愛日護輕暖醞造小春時桃溪雲斂一點郎星吐清輝  
鍊玉顏容難老點漆精神如舊不用摘霜髭厭厭薄蓬萊  
景戲踏兩鳬飛潘花底陶柳外細民肥萬家喜色融

作瑞氣擁牙緋憑仗春葱洗玉領畧朱櫻度曲引滿又  
何辭只待琴歌畢安步上丹墀

又夜泛湘江

江月冷如水江水碧於空晚來一霎過雨為我洗秋容  
悄悄四山人靜凜凜三更露下天濶叫孤鴻喚醒蓬窓  
夢身在水晶宮 揖湘妃招月姊御清風素琴韻遠不  
覺醉眼杏花紅禹穴騎鯨仙去東海釣鰲人遠此意與  
誰同倚拖一長嘯出壑舞魚龍

又登石鼓合江亭

千里倦游客老眼厭塵煙蒸湘平遠他處無此好江山  
把酒一聽欸乃過了黃花時節水國倍生寒輸與滄浪  
叟長伴白鷗閒傍江亭窮杳靄踞巉嵒水深石冷聞  
道別有洞中天待倩靈妃調曲喚起馮夷短舞從此問  
羣仙雲海渺無際波湧緩移船

念奴嬌

菊

小粧朱檻護秋英千點金鈿如簇黃葉白蘋朝露冷只



有孤芳餘韻華髮蒼顏宦情羈思來伴花幽獨巡簷無  
語清愁何啻千斛因念愛酒淵明東籬雅意千載無  
人續身在花邊須一醉小覆杯中醺醖過了重陽捻枝  
嗅藥休嘆年華速明年春到陳根更有新綠

蝶戀花

壬子

柳暗西湖春欲暮無數青絲不繫行人住一點心情千  
萬緒落花寂寂風吹雨喚起聲中人獨睡千里明駝  
不踏山間路謾道遣愁除是醉醉還易醒愁難去

念奴嬌

海棠時過江潭

曉來雨過遍海棠枝上  
胭脂如滴桃杏不堪來比並  
信是傾城傾國藏韻收香  
誰能描貌閣盡詩人筆  
從教睡去為留銀燭終夕  
不待過了清明綠陰結子  
無處尋春色  
荻荻輕紅飛一片便覺臨風  
悽惻莫道無情嫣然一笑也似  
曾相識惜花無主自憐身是行客

浪淘沙令

菊

秋色滿東籬露滴風吹憑誰折  
取泛芳卮長是年年重

九日苦恨開遲 因記得當時共撚纖枝而今寂寞鳳  
孤飛不似舊來心緒好惟有花知

採桑子

秋日丁香

一番染就春風巧細著工夫點綴紅酥此際多應別處  
無 玉人不為花為主辜負芳菲香透簾帷誰向釵頭  
挿一枝

好事近

早梅

玉頰映紅綃攬報東風消息雖則清臞如許有生香真

色相看動是隔年期忍不飲涓滴莫待輕飛一片却  
說花堪惜

鷓鴣天

梅

淡淡疎疎不惹塵暗香一點靜中聞人間怪有晴時雪  
天上偷回臘裏春疑淺笑又輕顰雖然無語意相親  
老來尚可花邊飲惆悵相携失玉人

臨江仙

落梅

雪片幻成肌骨月華借與精神一聲羌笛怨黃昏吹香

飄縞袂脫迹委紅裙  
枝上青青結子子中白白藏人  
那時別是一家春  
擘泥嘗煮酒拂席卧清陰

阮郎歸

落花時節近清明  
南園芳草青  
東風料峭雨難晴  
那堪中宿醒  
回首處自銷凝  
誰知人瘦生  
倚欄無語不禁情  
杜鵑啼數聲

青玉案

深紅數點吹花絮  
又燕子飛來語  
遠水平蕪春欲暮  
年

年長是清明時候故遣人憔悴  
竹雞啼罷山村雨正  
寥落無情緒猛省從前多少事  
綠楊堤上樓臺如畫此  
景今何處

卜筮子

膩玉染深紅艷麗難常好已是人間被楔時花亦隨春  
老喚取麴生來醉賞惟宜早此去陰晴十日間點點  
粘芳草

木蘭花慢

莫春時在分寧

博山香霧冷新雨過怯單衣正飛絮濛濛平蕪杳杳家  
在天涯春難住人易老又等閒過了踏青時枝上紅稀  
綠暗杜鵑剛向人啼 依依謾嘆鏤生鐔缺塵滿絃徽  
想北山猿霍南溪鷗鷺怪我歸遲青雲事今已晚倚小  
窻誰與話襟期對酒有愁可解擘牋無怨休題

浪淘沙令

丙寅在大坂

流水遶孤村楊柳當門昔年此地往來頻認得綠陰携  
手處笑語如存 往事不堪論強對清樽梅花香裏月

黃昏白首重來誰是伴獨自銷魂

木蘭花慢

同前

細桃花樹下記羅襪昔經行至今日重來人惟獨自花  
亦彫零青鳥杳無信息徧人間何處覓雲軒紅錦織殘  
舊字玉簫吹斷餘聲銷凝衣故幾時更又誰復卿卿  
念鏡裏琴中離鸞有恨別鵲無情齊眉處同笑語但有  
時夢見似平生愁對嬋娟三五素光暫闕還盈

阮郎歸

雪川作



幾回幽夢繞家山  
怯聞梅弄殘  
蕭蕭黃落客  
羶寒不禁  
衣帶寬  
身外事意闌珊  
人間行路難  
尋思百計不如  
閒休貪朱兩轡

小重山

至後一日長興趙宰到郡併招  
歸安烏程二宰及項廣文同飯

日脚纔添一線長  
葭灰吹玉琯  
轉新陽  
老來添得鬢邊  
霜年華換歸思滿滄浪  
喚客對凝香  
公庭鳬鶩散  
緩行觴  
何須紅袖立  
成行清談好勝似聽絲簧

臨江仙

莫子章郎中買妾佐酒  
魏倅以詞戲之因次韻

試問休官林下去何人得似高年壺中不記歲時遷吹  
簫新有伴食玉共求仙 有客樽前曾得見月眉雲鬢  
娟娟斷腸刺史獨無緣誰能聞一曲偷向笛中傳

又

思憶故園花又發等閒過了流年休論陞擢與平遷拂  
衣歸去好無事即神仙 況是老人頭雪白羞看紅粉  
嬋娟鸞孤鳳隻且隨緣莫將桃葉曲留與世人傳

水調歌頭

送魏倅

新漲鴨頭綠春滿白蘋洲小停畫鷁莫便折柳話離愁  
縹緲舳舨在望不用東風借便一昔到皇州別酒十分  
酌何惜覆瑤舟從此去上華貫入清流風姿如許自  
合唾手復公侯老我而今衰謝夢繞故園松菊底事更  
遲留早晚挂冠去江上狎浮鷗

清平樂

越上作

呢喃燕語共訴春歸去春去從他留不住落盡枝頭紅  
雨老翁袖手優游閒愁不到眉頭過了麥黃堪紫歸

期只在新秋

又

兒曹耳語借問何時去家在翠微深處住生計一犁新  
雨客中且恁浮游莫將事挂心頭縱使人生滿百筭  
來更幾春秋

南柯子

天末家何許津頭客未歸柳梢綠暗早鶯啼胡蝶不知  
春去遶園飛選勝多游冶當壚有麗姝青翰載酒漾

晴暉不忍十分寥落負花時

好事近

閒日似年長又在他鄉春莫柳外一聲鶗鴂怨落花飛絮  
芎羅只似舊時青人今在何處試問鴟夷因甚載西施同去

朝中措

杜鵑聲斷日曛曛過雨濕殘紅老色菱花影裏客愁蕉  
葉香中柳梢飛絮桃梢結子斷送春風莫恨春無覓

處明年還再芳叢

南柯子

秀叔娶婦不令人知  
以小詞為賀因戲之

對鏡鸞休舞求鳳凰自飛珠鈿翠珥密封題中有蠻牋  
細字没人知環佩燈前結輜輶月下歸笑他織女夜  
鳴機空與牛郎相望不相隨

朝中措

九月末  
水仙開

薔薇露染玉肌膚欲試鏤金衣一種出塵態度偏宜月  
伴風隨初疑解后湘妃洛女似是還非只恐乘雲輕

舉翩然飛度瑤池

西江月

用茶蘼釀酒飲盡  
因成此歇呈繼詩

荻荻落紅都盡依然見此清姝水沉為骨玉為膚留得  
春光小住 鴛帳巧藏翠蔓燕釵斜亸纖枝休將往事  
更尋思且為濃香一醉

浪淘沙

辛未中秋與  
文蔚述可飲

月色十分圓風露娟娟木樨香裏凭欄干河漢橫斜天  
似水玉鑑光寒 草草具杯盤相對蒼顏素娥莫惜少

留連秋氣平分蟾兔滿動是經年

柳梢青

鄭宰母  
氏生日

葭管風微萊衣香軟歌鳳將雛笑酌流霞問人何處別  
有瑤池相將月佩霞裾領鳬舄歸朝玉墀管取長年  
進封大國穩住清都

踏莎行

木落天寒年華又暮老來多病須調護詩編酒榼總無  
緣閒中贏得曹騰睡塵暗犀梳香消翠被悄無音信



來青羽新愁正自上眉峰黃昏庭院瀟瀟雨

清平樂

壬申  
除夜

一杯椒醕惜飲難成醉爆竹聲中人未睡共道今宵守  
歲不如且就衾裯誰能細數更籌三百六旬過了明  
朝却是年頭

卜筮子

癸酉二月雨  
後到雙溪

渡口喚扁舟雨後青綃皺輕暖相重護病軀料峭寒還  
透老大自傷春非為花枝瘦那得心情似少年雙燕

歸時候

又

散策問芳菲春半花猶未蓓蕾枝頭怯苦寒恰似人憔悴  
人莫恨花遲天自催寒去雨意纔收日氣濃玉靨  
紅如醉

江城子

癸酉春社

清波渺渺日暉暉柳依依草離離老大逢春情緒有誰  
知簾箔四垂庭院靜人獨住燕雙飛怯寒未敢試春

衣踏青時懶追隨野蔌山穀村釀可從宜不向花邊拚  
一醉花不語笑人癡

虞美人

甲戌正月  
望後燕來

鏡中失盡雙青髻懶更占花信小梅半謝雨垂垂未許  
輕紅破蕾綴桃枝社前歸燕穿簾語似說人憔悴自  
緣老去少歡悰不是春寒料峭怯東風

南鄉子

甲戌正月

雲淡日曛明久雨潺潺乍得晴社近東臯農務急催耕

又見菖蒲出水青  
池面縠紋平掠水迎風燕羽輕試  
出訪尋春色看相迎巧笑花枝似有情

南柯子

山暝雲陰重天寒雨意濃數枝幽艷濕啼紅莫為惜花  
惆悵對東風  
蓑笠朝朝出溝塍處處通人間辛苦是  
三農要得一犁水足望年豐

憶秦娥

甲戌賞春

臙脂點海棠落盡青春晚青春晚少年遊樂而今慵懶

春光不可無人管  
花邊酌酒隨深淺  
隨深淺牡丹紅  
透茶縻香軟

夜行船

賀將使叔  
成寶相寮

淡飯簾衣隨分過  
新成就庵寮一箇靜  
處藏身十分自在  
只恁麼有何不可  
過眼空花都見破  
紅塵外獨行獨坐  
也沒籌量也沒繫絆  
更覓甚三乘四果

臨江仙

和將使許  
過雙溪

鷓鴣一聲春事了  
不知苦勸誰歸  
花梢香露染薔薇  
小

梅酸著齒酒榼正堪携  
鴨綠一篙新雨過遠山半出  
脩眉仙翁理棹欲來時  
迤簷烏鵲喜報與主人知

驀山溪

巢安寮  
畢工

鶯啼花謝斷送春歸去  
雨後聽鶻聲恰似訴留春不住  
韶光易過暗被老相催  
無箇事沒些愁方是安身處  
栽松種菊相見為賓主  
終日掩柴扉只有清風時度  
不忺把酒又不喜觀書  
飢時飯飽時茶困即齁睡

憶秦娥

頭如雪塵緣袞袞無休歇無休歇買田築屋是何時節  
從今事事都休說巢安窠裏藏疎拙藏疎拙許誰為  
伴溪山風月

滿江紅

至日和  
黃伯威

宦海浮沉名與字不能彰徹青雲上諸公袞袞難登狹  
劣結綬彈冠成底事解頤折角皆虛說待黃梁夢覺始  
歸來非明哲易消釋空中雪多虧闕天邊月算人生  
必有衰羸時節任是一陽來復後梅花柳眼先春發料

明年又老似今年當休歇

玉樓春

丙子十月生朝


壯年糊口謀升斗朱墨塵埃黏兩袖黃梁夢斷始歸來  
依舊琴書當左右而今藏取持螯手林下獨居閒散  
又問之何以得長年寡欲少思安老朽

又

大都四序陰晴半天上油雲舒又卷若還心也似雲閒  
老色何由來上面生平辛苦今蕭散得喪榮枯皆歷



徧人言不死是神仙我但耳聞非眼見



雙溪類稿卷十

# 欽定四庫全書

集部

雙溪類稿卷十二

詳校官庶吉士臣吳烜

主事臣呂雲棟覆勘

總校官進士臣朱鈐

校對官學正<sub>臣</sub>翁樹棠

謄錄監生<sub>臣</sub>任銜萱

欽定四庫全書

雙溪類藁卷十一

宋 王炎 撰

表

賀太上皇帝慶壽表

代

天開華旦永垂統於千齡歲發熙春初儲祥於八表集  
邦家之殊慶混夷夏以同歡中賀竊以唐堯釋在位之  
憂勤乃登上壽黃帝全此心之清靜覬獲長生孰能獨  
存而常今茲方一遇乎大聖中賀恭惟尊號太上皇帝

陛下退藏於密允執厥中雖淵默以凝神何思何慮然  
海涵而施澤益遠益深刑好生而盡仁兵不殺以為武  
故上帝垂休於罔極俾斯民受賜以無疆矧惟與聖子  
以御圖可以葆道真而養性宜安榮之寢久膺戩穀以  
滋多禮備玉卮豈特至再至三而未已策增寶鼎殆將  
時萬時億以難窮臣外守魚符遙瞻象魏乾坤喜氣屢  
騰嵩嶽之呼臣子真情猶效華封之祝

太上皇后賤

太帝垂無疆之統共享康寧嗣皇承莫大之休永勤尊  
養游藏儀於上日益儲祉於長秋中賀恭惟尊號太上  
皇后殿下德備坤元化行陰教參堯道巍巍之大興舜  
心業業之恩父母尊而親具全華旦之慶天地長且久  
愈見歷年之多臣仰被榮光欣逢嘉會壽曰五福之一  
既並崇高歡呼萬歲者三願兼祝頌

今上皇帝表

堯仁天覆永膺眉壽以儲祥舜孝日嚴復即首時而稱

慶凝兩宮之喜氣溢諸夏之歡聲中賀竊以漢前殿之

奉卮唐淩煙之置酒非有無疆之景福莫能申講於上

儀顙是宏休屬于華旦中賀恭惟皇帝陛下欽承慈訓

纘紹皇圖乾稱父以至尊大函三極日為君而久照光

著重輪事無傳於千古之前禮再舉於十年之後母兼

乎愛翟衣愈共於康寧下被其恩鳩杖寢多於耆艾臣

外居侯服遙望宸廷象煥鈎鈐仰覩聖人之至德策增

寶鼎願齊太帝以長生

今上皇后牋

日謹三朝贊中宸之欽愛歲登八袞奉慈極之康寧儼  
禕翟以蕤儀偕袞龍而增喜中賀恭惟皇后殿下德全  
柔靜行備肅雍千億之多子孫益衍周家之慶五十而  
慕父母克同舜孝之誠共迎葭管之春再上玉卮之壽  
臣幸膺屏翰欣際休嘉依光離日之華永瞻繼照觀象  
軒星之次仍見重暉

賀太上皇帝慶壽表代

黃屋非心久儲神而自逸玉笄婉德並受福以無疆稱  
盛禮於中天沸歡聲於薄海中賀竊以坤配乾而稱母  
廣大惟均日有月以齊明照臨不息偉矣無前之盛事  
見於有道之熙朝恭惟尊號太上皇帝陛下凝命穆清  
游心淡泊始齊家而治國終與子以御圖在中得大似  
之賢克傳陰教配極並帝堯之壽申錫天休慈孝交孚  
邇遐來賀臣乘輅于外委佩無繇考六籍之傳聞尊榮  
獨盛想兩宮之娛樂祝頌彌深



太上皇后牋

長秋正位肅慈壺於九重端月始和衍壽祺於七袞享  
嗣皇之孝養齊太上之康寧歡洽宮中慶流宇內中賀  
恭惟尊號太上皇后柔恭粹美慈儉宣昭方紹興三紀  
之憂勤既資輔佐宜德壽萬年之福祿同極尊榮豈但  
見春秋之彌高蓋將同日月之久照臣遠乘驛傳阻接  
廷紳春滿玉卮遙想袞龍之喜氣雲深紫殿莫瞻禕翟  
之榮光

今上皇帝表

慈壺儲祥既並堯年之永昕朝展采益彰舜孝之隆喜  
溢宮闈歡傳寓縣中賀恭惟皇帝陛下膺圖出震繼照  
重離繇成德之溫文兼事親之欽愛萬年為父為母福  
既駢臻四海悉主悉臣養斯極至假有家之燕喜推錫  
類之龍光臣原隰驅馳雲霄高遠遙想奉卮之慶莫側  
駕行俯同扶杖之民但深雀躍

今上皇后牋

偕九重而侍膳祇奉母儀慶七袞以奉卮庸昭婦道新  
盛時之縟典騰諸夏之歡聲中賀恭惟皇后殿下位配  
乾剛德全巽順形慈儉於萬宇著肅雍於兩宮禮始內  
朝迎春祺而展慶化行寰宇勅天敘以移風臣越在外  
臺莫陪邇列聞熙朝之為壽如隔九霄慶象服之承顏  
當彌萬祀

賀太上皇帝慶壽表

代

慈極自願凝萬年之景命中闡偕慶紀七秩之宏休喜

溢堯廷歡均禹服中賀竊以德之大者斯能得壽道之  
妙者乃能長生居乾父坤母之尊在日君月妃之上匹  
休如此振古無斯恭惟尊號太上皇帝陛下誠極粹精  
心潛清淨玉螭有受獨觀昭曠之元禕翟與娛宜襲康  
寧之福難老並膺於天錫又新永受於春祺榮光瑞氣  
無遠而不周盛事綽儀自今而繼舉臣幸逢殊慶限在  
外僚仰望紫微聯鉤陳而一色俯同黃髮效嵩嶽之三  
呼

太上皇后牋

蘭殿居尊並慈皇而介壽玉卮行慶朝聖子以歲儀喜  
浹兩宮懽傳萬宇中賀恭惟尊號太上皇后殿下中臨  
戊位大配乾元弼成揖遜之風並受康寧之福陋金母  
之坐少廣同黃帝之得長生栢酒浮春及時以禮自樂  
椒觴錫嘏受命無疆惟休豈但七十歲自古所稀惟曰  
萬億年由今以始臣與聞盛事越在外寮占南極老人  
之星彌新瑞証望鈎陳大帝之坐永煥祥光

今上皇帝表

母儀正位配慈極之無疆聖孝竭情喜壽祺之有行盛  
儀行於廣內和氣溢於區中中賀竊以禮莫大於奉親  
福尤難於得壽惟中心欽愛根於獨至之誠故上帝監  
觀錫以非常之慶恭惟皇帝陛下震亨主器離照繼明  
為人君止於仁克廣因心之善以天下養之至益彰順  
志之誠固將膺戩穀於千齡宜但紀春秋於七袞榮光  
上著日月為之增輝惠澤下覃夫婦宜於偕老臣身隨

漢傳心在堯廷不須占天紀之三星始知至德但願呼  
嵩高之萬歲遙罄愚衷

今上皇后牋

象服在中謹晨夕問安之禮燕朝行慶見春秋紀歲之  
多歡洽兩宮孝刑四表中賀恭惟皇后殿下覩天作配  
應地用柔彤管無違恭肅俯齊於嬪御祿衣有翼愛欽  
仰事於舅姑衍七袞之宏休偕九重而共喜臣驅馳原  
隰瞻望雲霄有顯德在天廷仰望四星之明潤受介福

于王母願齊萬壽之崇高

賀太上皇帝尊號表

代

定寶命以貽謀退藏妙用罄輿情而歸美益著鴻名皇  
冊屢書帝廷增慶中賀竊以義皇上聖未彰揖遜之風  
堯舜至仁僅斂壽康之福惟此宏休之獨盛是宜顯號  
之兼隆然乾坤廣大或可以形容而日月光輝終難於  
畫繪尊號太上皇帝陛下龍飛無亢淵默自願釋黃屋  
之勤心獨游於物表撫亦符之仁運嘗濟於區中大業



久而寢昌正統傳之罔極赫赫睿謨之著巍巍成烈之  
崇其中存不測之神豈容擬議所寓皆有為之迹庶可  
名言臣仰望清光越居外服嘉平紀臘幸傳聞鏤玉之  
文太簇回春即遙贊奉卮之喜

太上皇后牋

位正長秋並慈皇而介壽禮行華旦受聖子之推尊光  
輝鏤玉之文葱鬱塗椒之喜中賀恭惟尊號太上皇后  
殿下行兼慈儉道極含洪方堯居黃屋而勞心既勤輔

佐及舜在岩廊而拱手遂極安榮宜都天下之顯名以  
著帝廷之殊慶允矣母儀之盛粹然壺德之全臣外守  
价藩幸逢熙事慈專意美無彤管之前聞永見崇高享  
紫宸之至養

今上皇帝表

受命無疆本貽謀之燕翼悅親有道益歸美於鴻名喜  
溢天廷歡傳海宇中賀竊以漢尊太上第為簡略之稱  
唐奉大安莫著欽崇之典惟顯號有加而無已乃宏休

振古而未聞恭惟皇帝陛下心極愛欽德高揖遜舜其  
至孝既克紹於基圖堯曰放勳遂兼隆於聲實矧慈闈  
之均慶宜皇冊之增崇炳若丹青一字不聞於溢美寫  
之琬琰千齡將見於滋多臣逮事兩朝阻陪百執翠輿夙  
駕遙瞻天仗之嚴龍袞交暉難祝聖人之壽

今上皇后牋

天子有尊而有父備彰婦道之勤聖人得壽而得名益  
集皇家之慶禮行前殿歡洽內廷中賀恭惟皇后殿下

靜體坤元柔兼巽順下齊嬪御成六宮雍肅之風仰奉  
舅姑贊萬乘愛欽之德爰增顯號用表宏休臣外守价  
藩幸逢華旦傳聞丹陛煥鏤玉之彌文遙想藻旒映褱  
衣之喜色

賀太上皇帝加上尊號表

時臨江權軍

儼螭渡以凝神心存清淨擁鴻休而建號德寔明昌將  
披皇冊之文丕顯帝庭之慶中賀竊以天子有道惟揖  
遜之最高聖人無名豈形容之可擬第歸美以為報難

固辭而弗居推崇允屬於九重愛戴實均於兆姓恭惟  
聖安壽仁太上皇帝陛下成功不宰藏用無為淵衷自  
得於遺珠塵務悉輕於脫屣雖浩浩具天之遠微妙何  
窮然昭昭若日之中英華可睹肅雖似文王之聖欽明  
體堯帝之安壽不止於萬年仁永同於一視出綸誕告  
已流諸夏之歡聲鏤玉增光行襲兩朝之綽典臣親逢  
熙事攝守下州瑞氣鬱葱遙想未央之喜輿情閭閻益  
知太極之尊

太皇太后表

配烈祖以造邦永新景命篤曾孫而嗣服宜衍徽音出  
渙汗於大庭洽歡心於廣宇中賀恭惟壽聖隆慈備福  
光佑太皇太后殿下厚踰坤載高在極先韜漢掩姬正  
四朝之內治孕虞育夏贊三禪於皇家於昭出日之重  
輪莫測補天之五色答民瞻仰發輝光於專靜之中挈  
國平寧勤保佑於纘承之始實循名而益顯功與德以  
兼隆垂百世之宏休無一詞之溢美臣攝官符守聞命

郵傳申講上儀因以知九重之欽愛俯殫善頌期於增  
萬壽之安榮

皇太后牋

思齊文母儷皇極以貽謀於赫湯孫增鴻名而歸美孝  
形廣內歡洽寰中中賀恭惟壽成惠慈皇太后殿下夙  
稟柔恭日行勤儉兼娥英之淵懿際虞夏之明昌色養  
太皇體愛欽之要道心循昭考開揖遜於後昆以聖聖  
而相承惟尊尊之為大順存乎惠仁發於慈表章令德

之休羨曼熙朝之慶事有光於圖史禮益盛於宮闈臣  
代匱武符馳誠魏闕金聲玉振獲聞帝典之溫文河潤  
山容彌覺坤元之博厚

太上皇后牋

並大帝以宅尊退藏於密順嗣皇之歸美必得其名藹  
瑞氣於長秋流歡聲於區夏中賀恭惟壽仁太上皇后  
殿下德方以靜用晦而明坤為母於兩儀震得男於一  
索方憂勤而相警俄清淨以自顧父子三朝迭揖遜冕



旒之下婦姑四世洽愛慈宮壺之中宜紀鴻休以儲燕  
祉壽方增於未艾仁愈熟而能安將練日而歲儀備成  
熙事可移風而成俗克廣孝心臣攝守左符馳誠北闕  
恭承渙號知天長地久之無窮倍覺輿情覩海潤星暉  
而胥慶

皇帝表

若帝之初既誕膺於駿命尊親之至宜丕闡於鴻名喜  
溢三宮歡騰六合

中賀

竊以遠稽堯舜嘗聞埒美於勲

華下逮商周莫覩親傳於父子惟熙朝之盡善視邃古  
以無前自非顯號之鋪張孰識宏休之淵懿恭惟皇帝  
陛下中函睿哲外發溫文出蒼震以御圖協黃離而臨  
下允矣繼承之有道海潤星暉粹然欽愛之由衷天明  
地察案六經而校德宣二祖之重光必得壽而得名聿  
申景鑠資事父而事母並著徽音臣攝守魚符遙瞻象  
魏雲章在上方將寫琬琰以維新穴見何知但務誦絲  
綸而胥慶

皇后牋

前殿宣猷建三宮之徽號內庭協慮廣萬乘之孝思家  
國榮懷神人悅穆中賀恭惟皇后殿下體坤柔順用巽  
潔齊依離日之繼明粲軒星而齊色以婦婦偕於子子  
具嚴大寢之朝自親親達於尊尊克篤重闈之慶蒐上  
儀於鏤玉凝喜氣於塗椒臣攝守下州恭承大號但與  
旄倪之衆不勝鼓舞之情

賀登極表

代

帝統無疆垂貽謀之燕翼天心所與履正位以龍飛宗  
社安榮華夷凱懌中賀竊以舜禹之盛非由父子之親  
傳商周以來莫覩聖賢之相授獨顓厥美創見于今恭  
惟皇帝陛下德極愛欽道全精粹震亨主器雷聲久發  
於青宮離麗重明日照遂升於黃道惟天地啓非常之  
運故邦家襲莫大之休盡孝事親永底一人之慶推仁  
厚下益隆萬世之基臣假守方州阻趨魏闕乾元正始  
函生共樂於春回辰極居中在外咸同於星拱

賀郊祀表

宿齊清廟極德產之精微宵陟圜丘假帝心之歆饗哀  
時多福惠此黎元竊以天地對祠致百神之受職祖宗  
作配彰萬世之垂休聿修昭代之上儀茲見聖人之能  
享恭惟皇帝陛下心傳堯道躬握乾符物阜時康和氣  
已周於穹壤刑清兵寢成功可告於神明罄四海以職  
來間三年而郊見璧琮異禮繭栗貴純以德召祥寶祚  
用申於景命與民同慶綿區遂浹於湛恩臣叨列皇華

預聞熙事泰壇展采莫陪百職之聯宣室受釐但祝一人之慶

又

泰壇升燎嚴合饗於兩儀法駕鳴鑾行親祠於三歲百神受職萬國均釐

中賀

竊以議禮惟享帝之非輕尊祖

以配天而為極稽諸周制用迎長至之陽參以唐儀兼陟大祫之位備茲縟典屬是盛時恭惟皇帝陛下繼聖重華躋民累洽中和兼盡禮樂測乎高深欽愛彌彰天

地為之明察路寢間修於宗祀郊丘復展於精禋奠蒼  
璧之二純協黃鍾之六變誠心昭假熙事備成薦明德  
之馨香永膺多福推至仁之慶賜下及兆民臣叨守价  
藩幸逢嘉會望清光於皇邸莫與駿奔聆渙號於雞竿  
遙同呼舞

賀天申聖節表

電繞北樞開皇天之申命日行南陸符赤帝之乘離聲  
夷夏以歡呼祝乾坤之悠久恭惟皇帝陛下宅心抱一

立極函三解帝堯黃屋之勤聖而有繼來王母玉環之獻德則無疆臣遠守郡符夙叨從索想鈞天之九奏莫望清光效嵩嶽之三呼敬伸善頌

又

望氣鬱葱是日肇無疆之慶游心淡泊自天增有永之年享至養於九重溢歡聲於億兆恭惟皇帝陛下存誠不息藏用難名既命重華精一傳於此道迺同黃帝清淨可以長生儲祥由北斗之樞斂福有南山之壽臣逖



違朝列外守侯藩日著重輪但仰照臨之久嵩呼萬歲  
敢忘祝頌之誠

又

漢統中天開殊祥於震夙堯仁得壽體不息於乾元沸  
嵩嶽之歡呼伸華封之善頌恭惟皇帝陛下宅心淡泊  
凝命穆清超黃帝之長生享重華之至養紀千秋之金  
鑑福祿無疆稱萬歲於玉卮孝慈兼盡臣遠乘輅傳阻  
入端門紫氣鬱葱喜過光華之旦黃星明潤潛占昌熾

之符

又

申命自天興赤符之熙運游心于道得黃帝之長生鑿  
六合以瞻依祝千齡之昌熾恭惟皇帝陛下存誠精粹  
玩意穆清乾健乘龍功既成而藏用震亨主器德可久  
以垂休凝瑞氣之鬱葱襲殊祥之羨曼臣外留楚澤仰  
望堯雲玉色晬溫想鈞天之萬舞丹衷悃悃效嵩嶽之  
三呼

賀會慶聖節表

電繞樞星運應東南之王氣天旋陽月德全西北之乾  
剛萬壽無疆四方來賀恭惟皇帝陛下宅中博大凝命  
穆清治寢明昌握漢符而興統誠兼仁孝行堯道以重  
華如日常明後天難老紀甲觀儲祥之旦修露囊稱慶  
之儀臣心戀闕庭身縻郡紱望卿雲之五色猶遠龍顏  
效嵩嶽之三呼但勤虎拜

又

慶嘉會於天庭祥開大電溢歡聲於海宇壽祝南山增  
日月之光華配乾坤之悠永恭惟皇帝陛下體元無息  
凝命維新孝德冠乎百王仁心浹於萬物山川貢瑞佇  
來王母之玉環臣庶均歡尚陋開元之金鑑臣逖違象  
魏分守魚符莫陪漢殿之周行稱觴再拜但效堯封之  
善頌委珮三呼

賀正

璿璣齊政行夏正之首時路寢歲儀循漢京之元會輻

奏四方之賀鼎新諸福之祥恭惟皇帝陛下協帝重華  
紹天明命體乾元之發育迎泰道之亨嘉九賓肅序於  
鴻臚六典昭垂於象魏奉玉卮為壽接千歲以承休振  
木鐸於朝釐百工而謹始臣久違內服逖守左符瞻紫  
極之居中莫聯星拱慶青陽之布德但有嵩呼

又

東郊春至潛回萬景之和南面天臨盛展三朝之禮永  
膺多福日靖四方恭惟皇帝陛下受命于天重華于帝

在璿璣以齊七政爰始歲功坐明堂而朝諸侯聿修元會垂典章於象魏來規諫於瞽矇聖德惟新而又新神筴亦朔而復朔臣叨分外闌久去中都頌美椒觴尚記在廷而稱壽令傳木鐸敢忘恭職以輸忠

進賀瑞芝詩表

紫宸致孝輦奕葉之丕圖清廟產祥發成華之上瑞三宮同慶九有均歡恭惟皇帝陛下寅奉貽謀嗣膺寶位視勲華而無愧行曾閔之所難欽愛潛孚神明昭假萬

年億載蘄聖父之康寧一祖十宗眷文孫而佑助丹楹  
有煒瑞草其芳曩者並生嘗在紹興之盛際今焉挺秀  
乃臨太室之西偏錫此鴻休開其燕衍乘輿稱警方瞻  
天仗之移大寢問安果見龍顏之喜四方來賀萬福攸  
同宜敷繹於聲詩以鋪張於盛事臣等濫塵冊府欣覩  
珍符沉遇歲儀行前殿奉卮之禮敢因歸美續齋房案  
謀之歌

進易解表

韋編淵永非淺識之能通斧依天高覬邇言之致察安  
陳未學上瀆聖聰竊以道載於經易為之祖馬圖示象  
犧畫成文首開天地之秘藏微顯帝王之妙用六爻以  
變乃分西伯之二篇八索既除遂有東家之十翼發揮  
不隱垂示無窮幽至於行乎鬼神顯足以措諸事業遭  
秦虐政僅為卜筮之書在漢諸儒未達乾坤之蘊未流  
浸甚本旨俱亡雖竭心思各持臆見京孟失之譎詭是  
生讖緯之端王韓矯以清虛偏雜老莊之說紛紛如是



泯泯至今欲扶正學以示人亦有儒先之名世然繫辭  
精矣可信而翻疑且互體昭然當詳而反畧或說明而  
義淺或語約而理偏通於數者不及玩辭釋其辭者又  
迷立象自出新意乃捭闔以為奇兼拾舊聞復支離而  
多鑿微臣何者獨學無師念先人老死於窮閭以經術  
竊傳於諸子因斯憤悱晚益鑽研味微言於六十四卦  
之中望先聖於數百千年之上參之衆說折衷良難斷  
以己私顙門何取閱朝華之易謝歎春木之方苞卦有

畫則其象具存象有意則非辭莫達是謂以蠡而測海  
烏能得兔而忘蹄幸世道之交興逢聖明之有造微如  
燭火何裨日出之輪動以震風亦發地鳴之籟茲蓋伏  
遇皇帝陛下體乾精粹用賁文明比附得民鼎新凝命  
悅親有道率由豫順之和接下思恭務盡謙光之美升  
羣賢而交泰育萬物以由頤節不傷財旅無留獄飾法  
於豐亨之後除戎於萃聚之時善皆出於中孚動不聞  
於小過以成大有之盛而消未濟之憂行三聖之所傳

莫非自得笑九師之甚陋安用多談尚期盛德之日新  
不恃成能之天縱疊疊政機之少暇孜孜經幄之多聞  
既知矣而重知故聖焉而益聖仰望虎生而文炳學兼  
極於高明俯惟馬老則智專見終慚於精博第大道或  
存於稊稗而先民亦采於芻蕘成篇頗極於辛勤敷奏  
覲塵於乙覽持周朴而過鄭賈本自堪嗤用燕說而談  
郢書或能偶中

賀生皇子表

代

蘿圖垂統茂開昌熾之期椒屋儲祥誕啓元良之正慶  
關宗社歡洽華夷竊以天子之尊重於繼體聖人之孝  
貴在寧親茲國本之系隆自帝心之昭假九廟益嚴於  
主宅兩宮共樂於含飴恭惟陛下道始正家仁兼育物  
宜衍神明之胄以綿平治之休果拜貺於燕禩遂協占  
於熊夢值藝祖興王之歲始同祥符毓嫡於宮中春入  
青陽潛助震亨之起人知赤伏永傳離照之明臣幸託  
洪私欣逢嘉會祝帝堯之多子何待華封歌大妣之百

男請賡周雅

進日歷表

昔為著作郎

祗遇燕謀並受得天之統鋪張鴻烈輯為繫日之編巨  
典一新奏篇惟謹竊以聖如堯舜載在典謨至於禹績  
之巍巍繼以夏書之渾渾繇今準古同三聖之相承首  
事表年宜一經之有作恭以太上皇帝秉英睿之德撫  
明昌之辰方謳歌歸己之初雍容巽位及付託得人之  
後清靜凝神規模具見於五年軌轍可行於千載不疑

不蔽臨照臣工克寬克仁惠恤黎庶恪守祖宗之成憲  
樂聞諫諍之盡言左戚右賢經文緯武累洽重熙之甚  
盛久安長治而無窮雖修身以道之真莫窺其妙而應  
世有為之迹可見而知欲謀烈之昭垂必事辭之俱稱  
矧德壽重華之授受屬乾道紹熙之討論以著帝興而  
王成且明父作而子述將萬世並藏於秘府豈一朝可  
緩於成書恭惟陛下嗣守丕圖欽承慈訓得諸面命允  
執其中加以力行同歸于治叅稽載籍信咸五而登三

申飭著庭俾襲六而為七秩若編年之備粲然傳信之  
詳臣幸與贊襄獲顙庀領文臻麟止敢言序事之工喜  
動龍顏漸助悅親之道

請皇帝御正殿復常膳表

音權禮部郎官

為民閔雨極軫念以憂勤修德應天尚飭躬而抑畏既  
潛消於沴氣盡亟復於彝儀輒籲衆言進干聰聽竊以  
湯后罪已有桑林六事之辭宣王側身著雲漢八章之  
詠初嘗自警終以弭災恭惟陛下恩洽黔黎誠叅蒼昊

和無不應氣宜玉潤而燭明數有適然歲或木饑而火  
早稍愆膏澤過有焦勞避前殿而弗居減大官之所奉  
清思眈眈與造物以潛通興雨祁祁喜良苗之無害益  
顯上仁之底下願裁變禮之過中分有常尊蒞彤庭而  
聽治用當備物享玉食之供羞茲惟俯徇於人心是乃  
仰承於天意

又

天人相與既能動以精誠君父至尊豈可過於貶損重



陳愚款丐賜俞音竊以路寢當陽崇高無敵宮垂侑饒  
豐腆有常借曰懼災若何廢禮陛下恤民慘怛事帝嚴  
恭導協氣以周游致頻年之皆稔屬當朱夏偶爾愆陽  
遂發玉音喟然引咎推至仁而厚下降清問以求言凡  
所施為悉皆詳盡雖卑官菲食亦惟誠意之所安然辨  
等設儀豈可邦彛之未復況雨膏之洒潤致民氣之昭  
蘇三日以往為霖共欣沾足一年之計殖穀可卜豐登  
宜荅人心稍寬聖慮亟朝前殿會百辟以天臨仍詔內

饗奉庶羞於日舉竭情控告得請為期

又

羣心合慮屢瀆天威聖志執謙未回淵聽竊以參天地之化雖帝王自致其誠道陰陽之和在輔相實司其職豈有過臣之甚恕而惟責己之過嚴恭惟皇帝陛下以欽愛之道承事兩宮以寬厚之仁寵綏四海論富庶之見効文景何加若水旱之為災堯湯不免乃緣閔雨專務省躬申勅諸臣並祈羣望蠲逋散利弛禁緩刑詢訪

盡言講求闕政以致祥而消沴皆務實而非文施德無私與天為一尚體扶持全安之意深存嚴恭寅畏之誠未稱警蹕於大庭不備珍羞於列等一人如此羣下何安伏望陛下外示尊榮中潛修省所以致隆於君體蓋將垂庇於民生謹酬酢於萬微益修善治責變調於三事永底豐穰

雙溪類稿卷十一

欽定四庫全書

雙溪類稿卷十二

宋 王炎 撰

表

賀重明節表

禮部郎官

望氣鬱蔥紀千秋而志始游心淡泊增萬壽以儲祥夷  
夏蒙休山川貢瑞恭惟皇帝陛下成功不宰藏用難名  
上仁為而無為民莫知於帝力神策朔而復朔德自合  
於天心渾然太極之函三繼以重離之明兩遠符禹啓

下視喬松臣等幸服邇聯親逢華旦絲囊金鏡歲申喜  
慶於人間鳳輦龍樓日仰孝慈於天上

賀瑞慶節表

神聖方興是日肇非常之慶華夷咸賴自天增有永之  
年歡洽兩宮貢來九牧恭惟皇帝陛下聰明秉錄熙洽  
題期上仁為而無為自得長生之道神策朔而復朔是  
開受命之符發祥佇見於多男介福永承於王母按六  
經而校德克傳舜禹之中參萬歲而成純下視喬松之

壽臣等幸逢華旦，獲望清光，非煙非雲，長近漢庭之瑞氣如山如阜，願賡周雅之和聲。

謝郊祀赦表

嚴精禋於泰時，茂對神釐，發渙號於端門，俯從民欲，散為和氣，薰作升平，竊以天覆物而好生，聖配天而同大，故親祠於三歲，必均慶於萬方，恭惟皇帝陛下，鞏固丕圖，欽承慈極，上帝監馨香之明德，可以告虔，斯民待惠澤于下流，為之錫福，備成熙事，誕布鴻恩，開以自新，洗

愆尤於犴獄樂其共利蠲逋負於閭閻根荄畢遂於生  
成雨露無私於滲漉臣逃聞奠玉有守分符瞻仰魏闕  
之遙未能就日倍喜置郵之速無不回春

謝厯日表

璿璣不忒職在日官鳳厯惟新布為時令庸示守藩之  
寵俾知敘事之經中謝竊以三百六旬之中四時宜定  
八百餘年之後一日或差無失其紀以為常必在其中  
之置閏恭惟皇帝陛下大參天地妙斡陰陽輔相裁成



雖本星辰之運盈虛消息亦窮象數之粗用夏建寅如  
周頒朔臣外居侯服獲奉賜書月要日成當首勤於吏  
治春耕秋斂務兼厚於民生

又

清臺測候順天道以惟新溫詔布宣授人時而有序叨  
在觀風之列獲承放朔之恩中謝竊以八十一分而起  
元漢歷雖詳於古法三百六旬而置閏堯仁獨厚於農  
功凡裁成輔相之宜在消息盈虛之節恭惟皇帝陛下

彌綸有道通變無窮寒暑平三光全孰越範圍之妙天  
地順四時當兼明占步之機躔起蒼龍日行黃道釐百  
工而成務率九扈以服勤載觀玉燭之成和皆自璿璣  
之齊政臣敢不謹於奉令推以諭民東作西成期嗣歲  
豐登之慶春先秋後體至仁溫厚之心

又

法垂象魏將新布治之經政協璿璣先謹授時之節叨  
奉侯藩之寄恭承王正之頒中賀竊以一元轉二氣於

無形太極行三辰於有象往來迭運盈縮難齊自非用  
智之精莫盡先天之妙惟聖幹旋於造化乃能推策於  
幽微恭惟皇帝陛下出震宅中體乾行健陰陽和而萬  
物得曲全輔相之宜天地節而四時成奉若變通之序  
因建寅於夏令參告朔於周官內允百工外同萬國臣  
敢不遵而作事詳以訓民辰起蒼龍之躔俾趨東作日  
行黃道之上同慶昇平

又

辰起龍躔將肇新於歲序數研鳳厯爰欽授於人時凡  
在侯方恭承王正竊以日官底日法固重於履端天子  
繼天義尤嚴於頒朔惟其一大統以賦政可以齊庶邦  
而勸功恭惟皇帝陛下道妙彌綸誠參化育上稽垂象  
三辰不失其經俯遂函生萬物各全其性均調玉燭默  
運璿璣追漢太初甲子之元行夏小正建寅之始協用  
五紀允釐百工臣敢不仰體聖心率循時令春先秋後  
觀八風律氣之和東作西成占五穀金穰之利

謝侍讀表

代

鳩工無補既陞戎部之班勸講何功又進邇英之讀控  
辭弗允惕厲難安伏念臣才不逮中識非致遠衝風鷁  
退素安州縣之塵勞少海龍飛忽玷朝廷之清貫自備  
員於諫省及分職於文昌獲侍宸旒許陪經幄竊揣愚  
衷之固陋何裨聖學之緝熙宜不掩於瑕疵乃更叨於  
寵渥況繹舊聞而勸誦將因往事以盡規訓備先朝鑒  
兼歷代由三晉訖於五季有安危軌轍之殊惟一祖繼

以二宗見朔守規模之遠用備燕閒之省覽合資鴻博  
之敷陳臣實何人身當此選茲蓋伏遇皇帝陛下成能  
天縱盛德日新遠考先民可知興替近遵家法無作聰  
明雖羣臣莫望於清光靡忘求助而大度不遺於舊物  
尚肯包荒遂申錫於綸音俾久親於玉色臣敢不仰承  
睿眷俯罄朴忠執古道以御今固莫高於獨智識前言  
而蓄德願少贊於多聞

謝除制帥表

代

守符假寵方稍幸於偷安制閫分憂乃驟蒙於改命控  
辭徒切莫返誤恩受任非宜終虞曠職伏念臣樸忠自  
信拙直少諧適逢初政之清明亟被公朝之選擇首當  
言責積彈擊之怨仇躡冠從臣無論思之補報既年侵  
而多病恐福過以生災丐均餽於祠庭尚把麾於輔郡  
盡憑覆護未至顛隲敢期謀帥於坤維遽使充員於人  
乏身隨漢節職隸犧圖內閣班崇中權寄重丹心未折  
豈無意於功名皓首何為已難勝於驅策是不能而求

止非以遠而憚行竟閱俞音莫從私願陛下仁天丕冒  
智燭周知惠恤遠民思固藩垣之助矜憐舊物嘗為議  
幕之游或諳練於事情可布宣於德意趣之就道雖明  
令出而必行許以造朝特示眷深而不替望龍顏而結  
戀浮鷁首以遐征蜀道青天此身易老華陽黑水何意  
重來誓當竭節以奉公少寬西顧終冀投閒之得請早  
遂東歸

謝冬衣表

時權禮部郎官



時令有經已及授衣之節聖心兼愛遂推賜帛之恩拜  
手知榮捫躬增感恭惟皇帝陛下內行禹儉外廣堯仁  
方遵周禮之始裘歲云秋矣因念豳詩之無褐寒者衣  
之乃班在笥之華遍逮充廷之士雖存舊典實出洪私  
嚴凝變而春溫被服資於天覆妻孥喜甚不知機軸之  
勤勞臣子深情可乏絲毫之補報

謝加食邑表

代

肅路寢以歲儀備成熙事拓爰田而加賜驟拜湛恩得

不因勞受之增懼竊以一人之大賚行於三歲之親祠  
雖曰舊章實惟新渥伏念臣宗盟是託天幸最多視公  
府而班朝列王藩而疏爵有何功伐膺此寵光逮與宗  
祈尤慚顯相敢意均釐之普及乃先異姓以叨榮茲蓋  
伏遇皇帝陛下至孝寧神深仁厚下親九族以致其裡  
祀默薦馨香斂五福以錫厥庶民遂行慶惠洪私所被  
左戚無遺俯念孤悖曲荷上心之友愛力防滿溢誓堅  
小己之寅恭

謝賜衣帶鞍馬表

代

奏徹銀臺俯拜土田之貺命傳丹陛隨頌服乘之華中  
謝竊以內府襲衣束之寶帶帝閑上駟飾以鏤錫是曰  
殊榮難乎濫授伏念臣才尤綿薄性復鈍遲獨荷聖神  
之見憐不嫌名器之多取初非有德乃分在笥之珍況  
復罔功亦辱解驂之賜茲蓋陛下義雖左戚仁則先親  
懋賞衆賢以示勸能之意推恩九族又明馭幸之私遂  
至寵光不遺微陋便蕃如此報塞謂何順以承君庶協

為棠之象勤於修己敢忘晞驥之心

饒州到任謝表

祝釐散吏甘弛擔於田廬起廢誤恩濫把麾於鄰郡榮  
似晝游之繡懼增夕飲之冰中謝伏念臣蹶蹶獨行栖  
栖平進晚遇聖神之採擇遍更學館之清華兼攝郎曹  
躡升戎監得踰其分自速顛隲行負於言徒深懲創方  
念過都之鷁退敢期出塞之馬歸再閱暮年洊叨新命  
起之間館畀以守符雖徽饒一水之相通最為便地而

顏范二賢之所治亦號名城第旱澇之相仍且公私之  
俱困欲施舍則財於何取務趣辦則民將不堪駑緩無  
庸鴻私難稱茲蓋伏遇皇帝陛下知人則哲御衆以寬  
捨其舊而圖新俾之改過用所長而去短試以撥煩雖  
合棄捐特加杖拭臣敢不省躬玷闕厲志廉平因密邇  
於里居易講求於民瘼廣朝廷寬大之意專務撫摩消  
田里嘆愁之情稍蘇凋瘵

慰皇太后牋

光堯太上皇帝升遐

漢宮興慟堯屋告終不堪聞玉几之言無復見彤車之  
出恭惟太上皇帝游心清靜介福壽康豈意彌留杞國  
或憂其天墜迄臻大故鼎湖莫駐於龍騰皇太后殿下  
久共尊榮曷勝傷痛願抑過哀而就禮期偕嗣聖以保  
邦對越顧成之靈安於長樂之養臣守藩於外奉慰無  
階莫伸同軌之誠徒結遺弓之恨

慰皇帝表

勸發九重莫致日嚴之舜孝痛纏六合共懷天覆之堯

仁遺誥一傳悲號曷已恭惟太上皇帝游神清靜體道  
希微因朝覲訟獄之歸未倦勤而授受備富壽康寧之  
福獨顯美於古今是宜神策之難窮豈謂夢齡之有盡  
乘雲既逝就日何因恭惟皇帝陛下光奉貽謀克全至  
德雞鳴問寢期解文王之色憂龍上遺弓遽傳黃帝之  
仙去愛慈之篤思慕惟深然而纂南面之丕圖於以奉  
東朝之至養願從天下之望少抑聖心之哀臣久荷洪  
恩忽聞大恤顧竹符分守于外莫望天顏念麻冕返服

之初難禁雨泣

慰皇后牋

遺誥下傳神已乘於雲馭嚴宸追慕痛兼極於坤輿恭  
惟太上皇帝道濟中興仁登上壽方安受天下之養乃  
厭為人間之留恭惟皇后殿下孝協帝心順全婦道遽  
罹大恤豈勝深悲願遵禮制之中務抑哀情之過永匹  
休於北極用致養於東朝臣遙睇宮闈外分符竹徒有抱  
弓之泣莫馳同軌之誠



慰皇太子牋

神游不返慈極如存仰黼宸之宅憂洎青宮而致戚恭  
惟太上皇帝壽康介福清靜凝神遠邁堯仁鳳歷莫窮  
於授受遽辭舜養龍胡不可以攀援皇太子殿下孝極  
事親義嚴尊祖念太帝乘雲而在上固自逍遙顧元孫  
出震以承天豈勝悲悼然上侍九重之邃且下為萬國  
之瞻宜節哀情俯遵禮制臣欽聞遺誥拘守左符但同  
民史以攀號莫望京師而奔赴

請聽政表

母儀仙去痛莫返於神游聖孝情深忍遽親於幾務不  
虞何譴輒有開陳竊以貴賤雖殊於喪致戚朝廷所重  
以義掩恩道不可以無權禮惟期於中節恭惟陛下至  
德極乎明察誠心主於愛欽四海瞻依共仰天庭之具  
慶羣情震駭忽聞雲戶之上賓越在淵衷難勝大恟然  
慈皇付託方觀神器之久安則庶政修明豈可繁機之  
暫弛非曰勿矜於細行尤宜致念於遠圖伏願陛下強

抑哀情勉承睿訓既返乘輿於廣內因以聽朝遂行哀服於宮中初非違禮

又

仁由中出固難過於哀痛令必上行豈可稽於聽斷敢申懇請冀獲矜從竊以母子之恩深一因天性帝王之禮異各有時宜事難泥古而非今道或趨權而合正恭惟陛下行高曾閔德協舜文遽失母儀之慈豈勝孺慕之切然娛侍大安之膳與欽承長樂之顏苟惟自過於

皇皇何以上寬於戚戚伏願陛下俯從輿議參考舊章  
抑素蹕之深哀既以順兩宮之意即清廟而親事又因  
慰四海之心

又

銜哀中禁漚懇需章雖聖心摧慕而難移亦愚悃閔陳  
之未至竊以海內之治必由獨斷之專天子之尊蓋異  
匹夫之孝仁主於因心之愛義行乎合理之宜致其愛  
則有餘哀用其宜則無過制因節文而為禮乃舒疾之

歸中恭惟陛下修胸中之誠極膝下之養彼蒼不弔罹  
此閔凶哀素難勝若為創痛然哀用麻而不斬以避所  
尊且貌若梟而非疏亦明其稱矧問安於大寢思保乂  
於皇家一已充充雖至暮年而猶戚萬幾疊疊詎宜曠  
日而不親伏願陛下勿徇難能求為至當奉太上丁寧  
之訓蒞治于朝念母儀顧復之恩致哀於內用副臣民  
之願是兼仁義之全

請御正殿表

縞冠銜恤尚蒞事於西廂黼依宅尊未詔儀於南向默而不請義有未安竊以官壺深憂固有居廬之次朝廷極辨難虛當宁之嚴豈宜執一而失中自可並行而不悖恭惟陛下孝根於性戚見乎容繇祲氛一集於慈闈而憂服弗違於哀次遂致喁喁之衆阻瞻穆穆之光雖創巨痛深難以俯而就禮然任大守重貴乎變而從宜伏願陛下入服衰裳出臨路寢聖人達節靡拘喪紀之常天子當陽大舉邦儀之正

又

執宮中之喪羣下無敢奪吾君之志辨門外之治一人亦難屈大義之公以迫切而有陳可逡巡而遽止竊以朝廷幾務今日最詳前代禮文後王難復縱欲守謹終之小節宜宜妨為政之大經恭惟陛下勤奉母慈曲全聖孝居必問安而養志疾先嘗藥而致憂中外共知初終惟一竟愆壽考之福莫曉皇天之心哭踊之哀殆幾於無數供須之厚弗委於有司無所不用其情非止可

觀其愛由此報坤元之厚德何以加焉如云虛天極之  
常居疑於過矣伏願陛下遵太上之猷訓酌先朝之憲  
章出向離明荅萬邦之瞻仰坐行夬決免庶務之稽留  
第於哀敬以無虧是即情文之兩盡

又

行天下之通喪必自致中心之戚宅聖人之大寶所宜  
正南面之尊顧此二端疑於兩重惟權以義乃得其中  
蓋哀痛無所窮者孝子之仁而品節不可踰者先王之



禮由周而上及魯為祥禪之期自漢以來易月有細纖之制古今之時既異軍國之務浸繁豈能釋庶事以居憂不免抑至情而蒞政未純吉服皆御法官恭惟陛下行可通於神明孝在安於宗社願體慈皇之畀付深思列聖之創垂內雖切於念親外必嚴於正位向明而治以裁刑政之詳當寧曰朝以肅臣工之衆是為達孝不止從宜

請聽政表

萬姓攀號永莫瞻於慈極九重追慕難即蒞於繁機輒  
進瞽言妄干聰聽竊以摧傷如割是為父子之深恩聽  
斷必親則有朝廷之大義恩不專於哀瘠義莫重於繼  
承恭惟陛下光奉貽謀聿勤養志雞鳴問寢覲有疾而  
必瘳龍去遺弓遽登遐而不返人心共痛聖意難勝第  
遺大而投艱任誠至重在節哀而順變理有當然伏願  
陛下仰對在天之靈勉遵易月之制日居北內寧寬固  
極之私時御西清宜出惟行之令用荅揚於末命以俯

慰於輿情

又

孝思之切雖難以理而自寬幾務之來豈可有憂而廢  
治既伸懇請未賜俞音竊以商宗居諒闇而不言蓋歷  
三年之久周后出應門而作誥僅踰七日之間時有不  
同禮無相襲恭惟陛下小心肅肅深愛蒸蒸節近千秋  
將上奉卮之壽痛纏六合忽傳憑几之言況國恤之頻  
仍尤宸心之難處然奉道揚之命已稽聽覽之期願抑過

哀深思大計俯觀臣庶懷仁共至於烏號宜審政刑述  
事永承於燕翼

又

衰服宅憂宜無二事訓辭諭旨再却庶言竊惟父母之  
通喪固有帝王之經禮貴猶遂服義不掩恩自漢文戒  
於傷生為之易月至晉武志於復古終以隨時故內致  
宮中之哀而外聽天下之治始者曰權宜之制久而為  
典故之常蓋事體之已然非人心之或薄恭惟陛下憂

勤蒞政愛敬事親何期三月之間併有再暮之戚敢言  
哭踊聖情為無益之悲但念纂承君道有至難之責若  
執居廬之古義恐非經國之永圖願參考於舊章仍遵  
行於遺誥情與文而相稱乃不過中哀以敬而為先是  
能盡孝雖知煩瀆終冀矜從

又

致愛盡仁謹終執禮釋萬微而弗慮閱三請以如初上  
既摧傷下皆隕越義難遽止辭則已窮敬惟太上之尊

初棄天下之養國家大故日月猶新豈臣民慟哭之相聞而明聖憂思之可解所以執喪而哀經未遑審事之樞機然而哀至於有餘是則過猶於不及共惟陛下承正統於三聖奉慈顏者六年今在亮陰實殊訪落將欲充至德以光四海莫如勤治道以撫萬邦願回獨見之高明俯從衆志思奉貽謀而繼述永固丕基

又

行天下之至難斯能高世循古人之通制乃不過中禮

有貴於從宜事何嫌於徇衆且物無不備人君固可以  
弗言而言或未聞臣下何從而稟令庶政之弛張在此  
斯民之休戚隨之故至哀雖出於真情然古禮難施於  
今日共惟陛下丕承景命恭奉慈廷盡其敬則備寶冊  
以歸尊致其樂則奉玉卮而稱壽憂色屢形於嘗樂戚  
容復見於衰麻由此道以事親已著上仁之實推是心  
而繼治乃為至德之全況於遺誥之徽言莫匪保邦之  
遠慮命之聽政無踰三日之期今也宅憂既至一旬之

浹伏願陛下念祖宗之傳序思億兆之依仁措神器於  
久安運天機而洞照深居喪次間延見於諸臣總攬政  
經示必專於獨斷幸垂淵聽毋弗與情不敢憚煩惟蘄  
賜可

請御殿表

清廟聽治既不免於從權路寢視朝乃尚遲於正位敬  
稽舊典率籲僉言竊以父母之喪厚於仁古稱重服君  
臣之分嚴於義國有彛儀詎宜銜恤於內心而輟宅尊



於南面恭惟陛下愛慕同乎虞舜慈良合於武丁謂食  
稻衣錦而難安其情非偽故衰麻苴杖以為飾於禮加  
隆方在倚廬遂虛當宁然丕承於基緒合大正於等威  
伏願陛下閱累朝之通行遵大行之遺訓出則俯臨於  
軒陛以明踐祚之尊入則如見於羹牆何損宅憂之戚  
又

百僚咸在覬聞稱警之音一札未俞堅守居廬之義知  
聖心之痛甚感衆志以愴然竊以漢制織衣主於易月

唐人慘服遂以臨朝變禮何嫌隨時為是共惟陛下以仁守位以正承祧方孚慈孝之誠遽有閔凶之變所以釋蟻裳而返內至於虛黼宸以居中夫禮不足而有餘哀可以矯常情之薄然事雖遽而弗凌節謂之循至理之中矧遵舊典之已行且順人情之所欲願當正守示上德之天臨用俾羣臣望清光而星拱

又

內行喪禮民咸嗟嘆於深仁外曠朝儀下願觀瞻於時

表屢陳愚悃莫奪聖情念慈懿之上賓俄壽康之厭世  
蒼黃失措縞素相仍夏清冬溫無復父母俱存之樂天  
傾地圻難勝國家莫大之災再傳遺誥於臣民孰不如  
喪考妣共惟陛下篤於至孝罹此重憂不忍視朝未為  
過制但帝居之前殿乃天子之正衙若非攝袂以面南  
尊嚴於上曷俾在庭之拱北肅敬無譁非得已而用權  
亦當然而合義仰祈報可勿拒控陳

又

喪寧過戚乃由仁愛之中存事或從宜無惡節文之小變蓋禮常以義而可起故正亦待權而後行嘗聞商有賢王三年諒闇滕雖列國五月居廬古人之行皆然此意之微久矣洪惟孝廟欽事思陵獨畢再朞之哀欲還三代之舊然稱情而憂服亦聽治於便朝共惟陛下議禮之詳捨漢書而不論制行之篤有曾閔之所難方執親喪當從先祖矧殊鄰之來弔行且造庭而大享之告虔又先卜日非端居於法座曷具舉於邦儀念承顏養

志之歡于今無及惟繼體守文之重其事當嚴願回聖  
意之皇皇俯徇羣情之懇懇

又

服制之勤不免俯從於易月公除之後曷為未可以視  
朝熟慮於心乞終其說竊謂再暮祥禋用於朝廷則不  
通七日釋纖施於父子則為薄惟無恩義之相奪莫若  
經權之並行入而遂服者足以伸自盡之誠出而負依  
者所以示至尊之體縱使舜文之君而處此必兼周漢

之道而行之共惟陛下之至仁克盡聖人之達孝未即  
外庭而恭已蓋疑憂服之在躬然康王見羣后之初喪  
嘗受幣主於門外而晉武聞諸臣之異議但終縞素於  
宮中按古昔之舊聞參祖宗之故實今罷朝者一月衆  
且有疑若廢禮於三年理誠不可願正當陽之位庶傾  
就日之心辭說已窮徬徨俟命

謝到任表

代

命以恩頒方訓戎於浙右職由叙進旋均餽於湘中祇

荷寵榮若為報稱

中謝

伏念臣素無籌略徒有樸忠執丈

二之父結髮驅馳於下列懷尺一之詔致身參佐於中

權積金革之微勞分玉鈐於外服戴履乾坤之大造保

全鋒鏑之餘生載惟湖嶺之間兼雜蠻苗之俗酋豪畏

慕既溪山之自清步騎精明亦鼓旗之有節於茲尸素

可以偷安茲蓋伏遇皇帝陛下大度包荒至仁善施龍

韜獨運必駕御於英豪馬老無庸尚矜憐其衰朽臣敢

不篆銘肺腑鞭策筋骸緩帶優游雖幸全家之溫飽据

鞍矍鑠敢忘報國之忠勤

謝除經畧代

驅馳澤國洵叨一節之華屏翰海邦誤玷十連之寄材  
雖弗稱義不敢辭幸風壤之咸和覺雲天之非遠伏念  
臣遲回平進拙直少諧自再易於州麾即屢更於輅傳  
賑飢湖右欲民病之少瘳折獄湘中期刑清而不枉雖  
思夙夜以匪懈未閱歲時而輒遷莫殫鞅掌之勞蔑有  
絲毫之補敢圖寵渥俾任蕃宣特分南紀之符既逾其



分又進西清之直以責其行伏遇皇帝陛下智燭照臨  
仁天覆幬心非泄邇而忘遠治務選賢而使能知臣用  
志悃悞而無華意臣臨事靖恭而有守擢之外服付以  
中權臣敢不仰佩龍光俯鞭駑鈍率先屬部返身必貴  
於廉平鎮撫裔夷為政則調其寬猛但喜漢封之廣敢  
言魏闕之遙

謝生日賜物表

代

來星使之光華不遺初度出天厨之豐美獨荷醲恩寵

冠宗盟榮生私室伏念臣識非警敏才謝英奇託體皇家顧此身之甚幸視儀公府曾何德之能堪敢期軫記於微生亦受匪頒之異數茲蓋伏遇皇帝陛下仁先九族施及多方謂屬近則愛深宜物多而意厚爰示慈於臺餽俾共喜於庭闈感厚下之鴻私若為酬德念教忠之遺訓惟有銘心

賀正表牋三道

慈福宮

春回北闕喜集東朝迓淑氣於三陽衍宏休於萬壽恭  
惟皇太后殿下儉慈為寶清靜長生獨乘天地之亨嘉  
備膺多福兼享聖神之至養俯庇羣方臣等陪侍未央  
阻趨長樂願覽頌椒之祝永觀歷英之新

重華宮


禮謹三朝方慶漢京之會德齊七政本由舜歷之傳凡  
在嘉生倍勤善頌恭惟皇帝陛下心清無欲道妙難名  
見萬物之情雖施仁而發育御六氣之辨獨藏用於希

夷宜乘月吉之和益斂陽升之福臣等親逢華旦共樂  
熙春太極函三熟測元功之不宰重離明兩幸瞻久照  
之無窮

文德殿

東郊春至首一歲以成和南面天臨卽三朝而展宸神  
祇薦祉夷夏均歡恭惟皇帝陛下繼體重離躋時開泰  
奉玉卮為壽承慈極以儲休振木鐸於朝警官聯而謹  
始用導迎於和氣兼覆育於函生臣等密侍清光欣逢

華旦六典昭垂於象魏恪遵布治之經九賓肅序於鴻  
臚共贊履端之慶



雙溪類稿卷十二

# 欽定四庫全書

集部

雙溪類稿卷十三

詳校官庶吉士臣吳烜

主事臣呂雲棟覆勘

總校官進士臣朱 鈐

校對官學正臣翁樹棠

謄錄監生臣任銜萱

欽定四庫全書

雙溪類稿卷十三

宋 王炎 撰

表

湖州到任謝表

便朝賜對近輔班條起諸閒散之餘付以蕃宣之寄喜  
非所望懼不能堪中謝伏念臣曩以散才濫升清貫老  
隨災至命與志違入三館者四年瑕疵不掩把一麾者  
數月瘡痍已成坐此罷歸宜其永廢乃從家食驟得守



符況古稱苔雪之間湖山清遠而今比京畿之內事物  
浩穰自揆何人可居此地第緣疎賤不敢控辭識暗慮  
疎何以撥煩而治劇年衰氣憊難於扶弱而仆強縱欲  
佩韋終虞傷錦茲蓋恭遇皇帝陛下皇明日照聖度天  
函在知人而能官人雖加遴選善救物而無棄物亦或  
兼收臣敢不益戒曠官深思補過寧催科之政拙惟務  
便民但寬大之意行是為報國

賀立皇太子表

明聖御天元良主器儲闈一建萬世垂無疆之休霈澤  
旁流四方同莫大之慶臣民闔閭家國榮懷中賀竊以  
神器之重欲其久安天下之本貴乎素定雖云今古之  
通義實係皇王之遠猷恭惟皇帝陛下鞏固鴻圖光昭  
駿德兢兢業業審於應萬機之繁繼繼承承求以接千  
歲之統定大謀於黼宸升上嗣於青宮下足以係億兆  
之心上足以重宗祧之守肆頒優禮佩玉契以超朝行  
講上儀服朱明而見廟臣密依象魏濫守虎符少海淵

深幸為蒼生而涵泳前星位正益知紫極之崇高

皇后牋

肇建儲闈丕承宸極雖由黼扆之獨斷亦賴椒廷之叶  
謀宗社儲休邇遐同慶中賀恭惟皇后殿下志存警戒  
德備柔明坤為母以順天震得男而主器人倫既正益  
暢二南之風國本不搖何煩四老之助臣謬分符竹密  
邇觚稜既瞻離日之明象垂繼照又覩軒星之次祥著  
重暉

皇太子牋

神聖御圖元良貳極主器藉於蒼震繼明協於黃離喜  
溢天庭慶覃海宇中賀恭惟皇太子殿下夙成岐嶷日  
就溫文惟皇家所重者繼承則儲禁宜嚴於監撫一字  
大號四洽歡聲益綿卜世之休允藉承祧之重念阻陪  
於象魏方分守於魚符位正前星但快觀瞻於瑞色澤  
流少海共欣涵泳於餘波

賀改元表

運獨斷以當陽權綱既正順羣情而更始年紀維新散和氣於熙春溢歡聲於華夏竊以近稽仁祖弭災開景祐之祥遠攷漢宣討罪保元康之治以今準古其義隨時恭惟皇帝陛下慈儉庇民寅恭事帝虛心無我本如天地之兼容方命者誅一發雷霆之震怒念邊陲之多故與歲事之不登渙發德音盡釐宿弊迓三陽之開泰申五始之體元納庶類於亨嘉班六師而耆定始於父子君臣之懿德並純全極乎神祇祖考之安福將曼羨

臣身縻印紱口誦絲綸正朔所加皆聳聞於大號耄倪  
相語永同樂於昇平

慰皇帝小祥表

小祥而練悽愴猶深長樂之朝著存如在恭惟皇帝陛下  
下俯同曾閔仰奉姜任慨念含飴之恩永違侍膳之養  
軒龍一掩隙駟難留惟追遠而弗忘雖過時而寧戚然  
福已兼於壽考數必有終而德又極於哀榮事誠無憾  
願少寬於聖意庶允協於人情遙望清光控陳愚款

皇后牋

萬世不祧廟已嚴於陟配一暮而練服亦貴於稱情恭惟皇后殿下協贊孝思丕承內治慈顏如在無由日侍於東朝懿範具存益致風行於南國願謹節哀之禮用全送往之仁

皇太子牋

東朝仙去俄閱暮年北內哀痾宣拘易月恭惟皇太子殿下侍至尊之側念太母之恩義莫重於承祧豈無悽

愴禮獨勤於問寢宜致溫文庶殫子職之恭少解聖心之戚

賀太子遷東宮表

黼辰宅中儼向離於南面青宮在左彰出震於東方歡洽帝廷慶覃海宇中賀恭惟皇帝陛下紹天明命鞏國丕基肇建儲闈密依宸極就少陽而正位消元日以取新地接龍樓貴便安於問寢門施雞戟示嚴肅於承桃臣叨守五符阻趨雙闕竹苞松茂知並受於安榮海潤



星輝喜益增於昌熾

賀講和表

使輶復命玉帛交修邊瓊班師干戈永戢堯言誕布禹  
服均歡中賀竊以渭水之盟敵人終屈澶淵之誓方內  
久安將欲保民莫如耀德恭惟皇帝陛下天涵夷夏子  
育黎元止秋殺以春生收雷聲於淵默能忍所以有濟  
是為中國之至仁善勝在乎不爭何論匈奴之長技申  
講丹青之信竟銷金革之彊軍散于郊共習騶虞之射

民安其宅載歌鴻雁之詩臣恭職蕃宣逢時泰定身縻  
印綬阻雙闕之追趨口誦絲綸與一圻而率舞

進東都紀年表

垂世規模莫盛本朝之列聖編年凡例宜如古史以成  
書削牘鋪張扣閣登進中賀惟一祖八宗之繼序與三  
王四代以比隆載在縑緗藏於金匱其道榮華而不朽  
其文浩博而難窮自顧陋儒素慚鴻筆嘗塵清貫越在  
麟臺歷十載以究心具四時而繫事逮茲斑白畢此汗

青兗而言之固多疎畧識其大者亦頗著明恭惟皇帝  
陛下濬哲自天憲章于古蒼姬而上遠則難行炎漢以  
來卑而無取闡皇猷而善繼捨家法以何求察進退於  
羣才稽弛張於百度內綏黎庶有省刑薄賦之仁外靜  
邊陲有習戰講和之策討論故實採摭舊聞庶便鑒觀  
但提樞要所傳者信非徒殫精力於空言可舉而行願  
以致隆平於當世

東宮箴

編年紀事可輯舊聞據舊鑒新是為成憲不量固陋遂  
有編摩竊以南渡以前東都之盛祖宗傳序相繼者九  
朝德業垂休將開諸萬世論撰於麟臺虎觀秘藏於石  
室金匱豈有他書可參正史然漢紀成於荀悅而唐歷  
出於柳芳倣其序歲月而書之欲以記事辭之要者視  
李燾長編而稍簡比熊克通畧而加詳甫上奏篇願徹  
宸旒之邃輒緘副墨進干儲禁之嚴恭惟皇太子殿下  
稟睿哲之資廣緝熙之學會道之要攷以聖經揆事之

宜質之家法庶因記注兼備叅稽仰祈英鑒之高明俯  
察愚衷之悃款

啓

上張南軒啓

元戎整暇方宣威嶺海之間膚使光華遂將指江湖之  
上雖屬部喜公之持節而搢紳望上之賜環蓋以將相  
必有世家不為創見至於父子俱係人望未始前聞諸  
葛瞻之視武侯則功畧無傳李吉甫之似贊皇則剛方

少貶其在今日非為美談當紹興搶攘多故之時賴先  
正扞禦艱難之力勲存宗社道濟生民故上天陰相於  
國家宜後嗣繼生於豪傑恭惟某官宗師先聖法象古  
人探六經所載之微言紹千載不傳之絕學愛君憂國  
誠心貫日月而無欺疾惡排姦直節類岱嵩而莫壓視  
諫官御史逡巡而失色對公卿侍從慷慨而必爭得喪  
齊一毫之輕聲名增九鼎之重仁人義士信知何世之  
無賢走卒兒童亦識元臣之有後去中州几千里而遠

在南服有三年之淹擁齊鉞以澄清移輜軒而廉問桂林象郡勤父老之去思漢水洞庭覺山川之改觀風采足以肅百城之屬吏慈祥足以蘇一路之疲民轉漕軍儲實為餘事謀謨王體自合還中而況朝野注目以大用期之聖明傾心其見知深矣鋪張前烈興起事功必規模先定於胸中則設施可觀於天下佇聞趣召即慶登庸炎才薄而無堪見愚而未達浮湛州縣所謀固出於為貧啜齎詩書此志未忘於稽古飽聞南軒非今世

之君子極欲北面與承學之諸生豈期墮朱墨之中乃  
獲在門闌之側恨無羽翼亟瞻盛德之輝光敢布腹心  
庶見平生之景仰

賀趙丞相啓

代

命出中宸任顯右揆協同心德九重倚謀國之有人綏  
靜華夷四海信用儒之無敵物情胥慶宗社匪休竊以  
事業之成就雖出於人為明良之會遇乃存乎天命中  
興之運作配以賢高宗舉傳說則得之夢寐之間明皇



用姚崇則契以立談之頃上既灼知而不惑下非先入而後量及經綸終底於有功則擢任不嫌於太速篤生上聖紹復丕圖宜無命世之才出輔有為之志恭惟某官學關百聖氣蓋諸公黼黻之文足以貢邦國之華著龜之識足以照事幾之變奮就功名之會曾無歲月之淹衆拱手以推先帝屬心而圖任然而軍國之務寄諸一相位望之重冠於百工慰天下之觀瞻立朝廷之風采愛惜名器維持紀綱裕民和衆以固根本之安選將

練兵以壯爪牙之助策惟自治實不先聲在當今事勢  
之非輕必平日謀謨之有素佇聞施設仰副倚毘某久  
託餘光欣聞盛事掌北門之管鑰方備蕃宣望東閣之  
衣冠莫陪趨進上為天廷贊得賢之慶下知海宇有開  
泰之期咏頌之誠編摩罔既

賀王樞使啓代

顯頌制冊分秉政機尉相等尊貴選材於已試聖明注  
意信謀國之無疑字號一傳歡聲四溢竊以輔相之責

任至重君臣之會合尤難惟作哲之明曉然見天下之  
是非則在位之人足以關國家之輕重風采聳動決無  
間言規模弛張終底成績某官忱恂自信碩大有容靜  
以秉心莫測謀猷之素蘊形於臨事始知文武之兼資  
下所具瞻政將焉往延登揆路以寬和為百辟之師進  
長樞庭有道德運五兵之末名符於實事副其言圖我  
舊人亞於元宰用見始終之同德能踰前後之數公位  
望愈高獨尊重本朝之勢功名不朽將大書盟府之藏

某久隔英風欣聞成命方出分於符節阻趨進於門闌  
欣抃徒深敷宣罔既

謝劉司業啓

邑下棲遲敢聞知於當路臺中廉訪肯薦寵於孤生恐  
傷左右之明實過平生之望嘗聞官爵乃厲賢之公器  
古人無援下之私恩孰抑未伸所知必舉故秀民皆可  
以類進而仕者不貪於躁求今昔異時品流滋濁墮在  
選人之數限其舉主之員初以拔才久而貽弊膏粱有

援翩翮馳驟於通衢韋布無津往往浮沉於下位不堅  
素守寧免自媒乞憐以諛佞之辭借世以請求之力志  
於苟得恬不為羞既士氣之不張於人才乎何取誰肯  
提衡於達官獨加推轂之公心矯俗之非收人所棄有  
名世力行此道乃善人胥待而興可備搜揚豈無茂異  
至如炎者半生挾冊千里攜孥欲達而窮殆類痿人之  
思起何因以進懼疑拱壁之暗投國士無雙揆能不爾  
貴人數百知己者誰已甘流落於窮途亦辱吹噓之餘

論許之以清苦之節則察其粗識廉恥期之以遠大之  
業則欲其益務操修自慚拜賜之屏營人嘆見知之特  
達茲蓋伏遇某官清明無蔽剛毅不回聲名重於一時  
許與信於四海出為天子之耳目詳辨是非如見衆人  
之肺肝灼分能鄙欲州縣無滯淹之士為朝廷廣採擇  
之誠不遺一介之微俯借片言之寵矣敢不治心養氣  
潔已奉公知軒冕外物之儻來安其有命誦詩書古文  
而不廢守以終身無累知人是為報德

謝呂鄂州啓

五馬之貴方幸瞻依一鶚之稱誤蒙收錄顧承乏在衆  
人之後而見知處屬吏之先不勝踴躍之私曷報生成  
之賜且先民非不欲仕然君子未嘗自媒惟持養之有  
餘寧浮沈而無悶既在下者得失舉安於定命故先達  
者薦揚非市於私恩有才豈病於無聞不肖雖窮而何  
憾古道寂寥之已久物情躁競而不還凡登名薦士之  
書亡為國擇人之意非有宦游之契好即因權要之請

求孤寒無津流落者衆孰能矯此末流之失必有卓然  
命世之豪宜得異才乃堪公舉如炎者謀身甚拙涉世  
多艱投簡冊之鉛黃對簿書之朱墨適有依仁之幸僅  
無速謗之虞猶未能忘情軒冕之間豈不願託迹門閭  
之下第畫戟開藩之始繫青衫為隸之新半載一章焉  
能兼及同寮諸彥俱合在前敢期特達之恩獨借吹噓  
之寵茲蓋伏遇某官提身肅括鑒物清明帝所倚毘澤  
國持專城之虎節士皆景慕家聲為四海之龍門謂異



時經濟於王廷宜平日蓄儲於人物侏儒斷木不使有遺蘧蔭病夫未必無用假以齒牙之論獎其執掌之勤炎誓當增益未能潔齋所守敢為矯激求居官赫赫之聲專務省循竭為善孜孜之力少圖報稱無負品題

上周總領啓

按部十州方見繡衣之風采總財六路又傳金節之光華凡預帡幪率同欣抃惟荆襄之重鎮在江漢之上游鐵馬萬羣誰何要害木牛千里繹絡轉輸非芻粟之有

餘雖金湯而何恃要在使公私之兼濟必有能舒卷之  
通才恭惟某官簡易而有文疏通而知要物流而金石  
獨止能沈潛道德之淵龍翔而雲霧必興終奮發功名  
之會見諸歷試動則有聲既乘輅大江之西即持斧重  
湖之北提一旅貔貅之衆解五溪蜂蠆之屯奏此膚功  
陞於拱著然上意撫摩於戰士欲異時馳騫於中原調  
度軍儲肅將使指錢流地上固不勞鞭算之精敵在目  
中當預定廟謀之密計日以俟邁公之歸矣牢落小儒

浮沈少吏攝官三歲依德二天少寬速謗之虞適有事  
賢之幸寒鄉之冰氏窮甚敢期自貢於姓名高漢之星  
使非遙即卜進瞻於顏色其為悃悞罔究編摩

回万俟監鎮啓

望先丞相如古人之遠恨不及於門牆聞貴公子有儒  
素之風喜將瞻於紳笏尚無一紙以修敬忽拜朋緘之  
好音恭惟某官世系光融人才膚敏先聲騰踏宜立上  
於通津緩步從容乃不卑於筦庫然主上博訪名臣之

華胄在執事必有諸公之裏言雖脂轂以啓行即賜環之亟下炎半生不偶千里倦游拏短艇以東歸有懷鄉社裏青衫而浪走更落天涯敢期聯事於王官乃獲依仁於長者烹魚得尺素甚慚厚德之撫謙窺豹見一斑行快平生之景仰

回趙運判啓

代

申錫湛恩榮顯外計慰遠方之觀聽增庸使之光華郡國歡傳交朋相慶共惟某官褫身肅括泣事清明被服

古文用志俯同於韋布發揮素蘊美名自滿於搢紳將  
指漕臺觀風南紀舉鞭而計盡知錢穀之盈虛攬轡有  
懷詳問閭閻之疾苦海濱嶺嶠如在中州父老兒童熟  
知德意帝從人欲衆願公留雖持節以按行少淹外服  
然賜環而入覲必有裏言某獲預雅游欣傳新命山川  
遼遠未遑修一紙之書使介鼎來乃重拜朋緘之貺彌  
深贊喜罔罄敷陳

回吳憲啓

代

疆場牧寧冒据中權之重山川聯絡旁鄰英蕩之光深感撫謙不忘舊好恭惟某官家聲碩大人品高明負立事赴功之志而居以靖恭懷牧民御衆之才而加之豈弟懋昭賢業自致通津簡在上心肅將使指惟梁益去朝廷之遠尤急綏懷而已夔在岩谷之間不無幽枉為上布好生之德使民見持法之平行奏最於甘泉即通班於文石某與時寡偶有志未成茲當會府之藩宣亦藉同僚之推輓緬懷先世嘗共濟於艱難在我後人宜

相孚於聲氣言辭不敏喜愧惟深

與郭判院啓

傳誦杜紫微之文久思焚筆願識韓荊州之面恨不登  
門豈期小官為墨綬之僚適值長者佐繡衣之治殆天  
幸而抵此非人謀之能然恭惟某官心藏萬事之著龜  
筆落四方之膾炙豈止敵數百人於禮部氣壓同儕不  
勞奏三千牘於公車聲聞當宁志在青雲而自許德如  
白玉之不緇意謂驂騑騰踏已升於要路何期鴈鷺徘徊

徊未上於層霄暫翊使華屈臨吏事雖輜軒金節非奇  
才不共於官聯然文陛赤墀在內服尤需於豪傑固知  
積薪無長孺之望必將前席喜賈生之歸炎孤陋無聞  
崎嶇多難甫上南宮之第忽有北堂之憂未能糊口於  
食貧寧免折腰而干祿方且逡巡在九品之賤孰能推  
輓於諸公之間念兒時聞執事之名若瞻北斗乃今日  
快平生之願可見景星安敢內交庶幾依德宦游如幕  
上之燕少假扶持學術類甕中之難尚期開發



賀李叅政啓

中宸出命南服開藩上既起公於燕閒之中委之卧護  
公惟撫民以清淨之政允也來蘇將令老穉歌舞於湖  
山不過樽俎笑談於庭戶十州聯絡一意瞻依某官備  
道得中和之全修已盡薦欽之實靜而充德業之蘊如  
海涵地負之含洪作而應事物之幾乃燭照龜占之昭  
晰以堂堂柱石之老應兩兩台階之符身上黃扉意安  
綠野傲睨功名之外已雖處之澹然經綸明聖之時衆

固望之久矣胡不秉圭而入覲乃煩擁節以來宣命申  
伯式是南邦姑以慰遠民之願有伊陟格于上帝豈其  
緩同德之求佇聞三入於中書豈但再叅於大政矣無  
適時之用有信古之愚知命之窮難容心於僥幸為貧  
而仕但苟祿以浮沈敢期半水之孤蹤忽近二天之大  
庇雖云自售可作進士上宰相之書更願公歸繼為聖  
主得賢臣之頌其諸欣忭罔既敷陳

又代

左符分守中詔趣行真館燕閒公固無心於寵利名城  
卧護上深注想於忠嘉一州喜元老之來四海願舊人  
之用某官直方有守篤實無欺遠猷贊天緯之幾微厚  
德為王官之儀表雖經綸之有道而舒卷之隨時功名  
之慮既輕但願從赤松耳朝野之望方切不出如蒼生  
何起自殊庭付之輔郡將欲還諸左右豈惟賴以蒲宣  
民自得於湖山事但責於丞史洪河之潤九里福既及  
於京師泰階之次六符位宜陞於上相某遯違牆仞側

聽郵傳畫戟開藩遙想春風之及物介圭入覲即觀霖  
雨之濟時

賀王倅啓

細札疏榮貳車來翰屈相門之華胄贊帥閫之壯猷藹  
然先聲副此輿願辱在泥塗之中久矣自附鄉曲之末  
可乎某官妙論風生英標山立惟先正是似當奮發功  
名之途與儒素相高獨沈潛道德之奧挾龍淵之犀利  
展驥足之奔騰北極九重念鈞衡之舊德長沙千里乃

節鉞之大藩爰得象賢暫臨別乘衡山湘水不妨攬秀  
氣於胸中文昌紫微行即問要津於天上炎薺鹽半世  
簿領三年窮鬼驅來冷官在此念由王子而得姓疑同  
鳳閣之宗況居鄰郡而受廛密邇龍門之側自顧一書  
生之貧者今有半刺史而依馬望公鼎來何翅黍苗之  
仰膏雨同列相賀亦如荆棘之近慶雲欣抃之私編摩  
莫既

回李監庫啓

望門闌百里之間未能修好隨官牒三湘之外敢意同  
僚坐客無壇方嗟獨冷呼童烹鯉驟得好音某官歸然  
闕閱之高加才猷之美金吏百鍊而游刃無滯霍在  
九臯而孤標不凡平日先聲已騰湧薦紳之譽青雲緩  
步聊低回莞庫之卑恐裏言之亟聞即中詔之催去矣  
蒼髯欲雪黃卷生塵幸執事接踵而來有鄉人會面之  
喜拜貽問發緘之始如獲瓊瑤願定交傾蓋之時相為  
金石

謝李侍郎啓

計臺下逐客之令幕府致招士之誠棄官而歸已決高  
飛遠走之興慕義而返敢辭驅去復來之羞誰云一介  
之書生能屈十連之元帥親勤枉駕不許褰裳士類以  
為美談見者無不改觀顧禮意如此其厚雖豪傑亦何  
可當心非木石之無情施等丘山而難稱凡蓄於肺腑  
而未白者請滕其頰古而備言之夫憂道不憂貧者信  
窮通之在天可殺不可辱者厲廉恥以立己自烏能擇

木之說不行於世而猿欲投林之情但切於中惟利重而義輕寧身伸而道屈居上者喜怒難於自克在下者去就失之不明如其奮螳螂之臂以當隆車所謂用蚘蟬之力而撼大木然吾黨之論有是非而無利害流俗之見明利害而昧是非雖知其難為得不勉如炎者奮身孤苦用意濶疎謂仕者有時乎為貧雖匹夫非可以奪志幼而務學亦既講之詳矣學以從政遂自貶焉可乎矧茲庠序之官號曰師儒之職儻不守準繩以治己



豈能為領袖以率人奈何疾惡太甚則怨所由生知人不明則過亦未免初有含沙之蜮讒忒潛行遂來點璧之蠅訟爭遽起苟鄰人舉似竊鈇之態則慈母且有投杼之疑而況上下之情難通固宜鄭廣文遭官長之罵曲直之理未定孰信陽司業有諸生之留無復麾之不去招之不來亦姑悠然而辭汎然而受又念半生挾冊方得一官千里攜孥本圖薄祿為郡督郵投劾而去嘗疑靖節之太高對部使者納敕而爭難學濂溪之大勇

累有啼飢之百指家無破屋之數間若非真喪心而病  
狂何遽不旋踵而疾走蓋欲留而不可非得已而遂行  
幸而不見絕於大君子之門察其不徒為是小丈夫之  
怒茲蓋伏遇某官負四海之公望為一時之耆英育德  
本乎剛方待人濟以夷易愛惜後來如場師之養桐梓  
收拾善類如良醫之聚參芝觀其困窮有此顛沛特加  
憐憫若已推而納之溝中未忍棄捐以禮羅而致之幕  
下擁前旌而一出陪後來以旋歸無忌虛左以迎侯生

第矜豪俠之節益州備禮而見嚴子本非真實之情以  
彼相方惟茲專美可以激懦夫之氣不徒為寒士之光  
炎敢不深防朋比之嫌益戒讒邪之害蠶尾之毒蓋小  
小爾蝸角之爭亦洶洶然衆口風波於今少定一區玉  
石從此遂分容我庇身有公知己非韋思謙何足為重  
如石處士其尚肯來敢為矯激之言不合中庸之行珥  
筆喜訟者數輩既削迹而無餘纓冠往救者百人皆同  
聲而相應共加講習日務省循進人若加諸膝退人若

墜諸淵終亦付升沈於度外忽言不返諸身惡言不出  
諸口但思遠恥辱於方來報德之懷濡毫不盡

謝蘇漕啓

情可疑而貽咎事既白而辨誣知君侯不立城府於胸  
中使寒士終託帡幪於節下昔者凜焉何恃而不恐今  
則坦然自安而無憂蓋越人關弓姑付之一笑而非怨  
而曾母投杼其聽以多言而易疑公既開心能釋於小  
疵炎亦醋舌自悔於前失載惟草莽之賤辱在泥塗之

中欲與諸生稍明此道靜而觀得喪之變患乎無上下  
之交直情徑行孤立自信域含沙而射影犬吠雪而同  
聲盡心力後必有災嘆關防之所不及畏首尾身其餘  
幾見風波之易以危宜斂版以羣趨只可褰裳而疾  
走某官喜怒以類是非無欺方變白為黑而未分小加  
訶譴及惡紫奪朱之既審曲賜函容乃知剛決之威中  
有和平之德炎敢不體寬假之意守操履之常宜願棄  
官鹿走險而急何能擇既容尸祿鵲遶樹而枝有可依

感激之懷編摩莫寫

賀李侍郎致仕啓

抗章得謝解印言歸上心雖欲其少留難回雅志士論  
皆推其勇退莫繼高風惟聖賢行藏出處之幾如天地  
消息盈虛之運居靜所以止其動用晦所以全其明庶  
無招損而害盈是謂守謙而持滿故先王之待耆德雖  
賜杖以示優然君子之守禮經必懸車而佚老自夫義  
不足以勝利而昧於辭受道不足以制慾而怵於榮枯

聽其言則競思返駕於山林察其情則無不撓情於軒冕是以進退不失其正惟聖人然後可能至於明哲以保其身在大雅亦所深美必治氣養心之有素斯樂天知命而無疑用能蟬蛻塵埃鴻飛霄漢以知足而保功名之美以見幾而無悔吝之疵以辭榮而上全明主之恩以守節而下激貪夫之志誰謂今世獨無斯人某官篤實而不欺清靜而寡慾剛大而有守恬退而無求德為天下之老成學到古人之微密達惟徇道入陞法從

之班志在為民起殿介藩之重去就有禮卷舒以權收  
身於康彊之時用志於寵辱之外蓋德之貴則三旌之  
位非重仁之富則萬鍾之祿非多自養之厚則視外物  
而皆輕自信之堅則入流俗而不變方將以雲山為戶  
牖以泉石為樽壘以緩步為車輿以清談為絲竹嘯咏  
風月偃仰煙霞招里社之故人時同燕笑訪山中之幽  
子相與過從初非韜光匿迹而兼園綺之高不待吐故  
納新而得喬松之壽能令後進識前輩之典刑却笑舊



聞少先賢之完傳然而忠力方壯德齒俱尊國家有事  
足以折千里之衝朝廷願治足以揆百工之政或不免  
因時而特出恐未能與世以相忘矣求道無聞事賢甚  
切斂版獲依於榮戟摳衣許附於門牆既耳提之以發  
其顛蒙又手援之以扶其危殆如嚴父察兄曲加愛於  
子弟宜腐儒小生所敢望於公侯稟粟俸錢方墮泥塗  
之賤幅巾藜杖莫從邱壑之游倍懷贊慶之誠不勝瞻  
依之切



雙溪類稿卷十三